

Acordo de Consello de Goberno, de 24 de xullo de 2026, polo que se aproba a Normativa que regula o nomeamento de profesorado emérito da Universidade da Coruña

PREÁMBULO	1
CAPÍTULO I. O profesorado emérito	2
Artigo 1. Definición	2
Artigo 2. Requisitos	2
Artigo 3. Actividades	2
CAPÍTULO II. Procedemento para o nomeamento de profesorado emérito	3
Artigo 4. Solicitud	3
Artigo 5. Documentación	3
Artigo 6. Tramitación	3
Artigo 7. Nomeamento	3
Artigo 8. Prórroga	3
CAPÍTULO III. Réxime aplicábel ao profesorado emérito	4
Artigo 9. Condicións	4
Artigo 10. Vinculación	4
Disposición adicional. Habilitación	4
Disposición transitoria	4
Disposición derogatoria	4
Disposición final. Entrada en vigor	4

PREÁMBULO

A Lei orgánica 2/2023, do 22 de marzo, do sistema universitario establece no seu artigo 81 as regras a que se axustará o nomeamento do profesorado emérito por parte das universidades.

O Decreto 94/2025, do 6 de outubro, polo que se aproban os Estatutos da Universidade da Coruña regula, no seu artigo 58, o nomeamento do profesorado emérito e atribúe esta competencia ao Consello de Goberno.

Neste marco, o Consello de Goberno da Universidade da Coruña aproba esta normativa, que recolle os requisitos de acceso á figura do profesorado emérito, as condicións relativas ao seu desempeño e as funcións que poderá desenvolver.

CAPÍTULO I. O profesorado emérito

Artigo 1. Definición

O profesorado emérito será nomeado entre o profesorado funcionario ou laboral que prestase servizos destacados na Universidade, co fin de que contribúa desde a súa experiencia á mellora da docencia e ao impulso da investigación, a transferencia e o intercambio do coñecemento.

Artigo 2. Requisitos

As persoas que optaren ao nomeamento como profesora ou profesor emérito deberán reunir os seguintes requisitos:

- a) Cumprir a idade de xubilación forzosa no curso en que se presente a solicitude e estar en situación de servizo activo na Universidade da Coruña (UDC).
- b) Ter a condición de profesorado permanente.
- c) Ter prestado servizos na universidade pública durante un mínimo de 30 anos a tempo completo, 15 deles na UDC.
- d) Ter recoñecidos cinco tramos de actividade investigadora e seis tramos de actividade docente.
- e) Ter dirixido seis teses de doutoramento, ou ter sido investigadora ou investigador principal de seis proxectos de investigación financiados con fondos públicos en convocatorias competitivas alleas á UDC, ou ter rexistradas tres patentes en explotación, ou ter creado unha empresa *spin-off* cunha actividade contrastada durante un período mínimo de oito anos que produciase beneficios para a UDC.
- f) Non ter sido obxecto de sanción disciplinar firme.

Artigo 3. Actividades

O profesorado emérito poderá desenvolver as seguintes actividades:

- a) Participar en ou dirixir proxectos de investigación, conforme ás condicións que establezan as respectivas convocatorias.
- b) Asinar contratos para realizar traballos de carácter científico, técnico ou artístico de conformidade co previsto no artigo 60 da Lei orgánica 2/2023, do 22 de marzo, do sistema universitario (LOSU).
- c) Dirixir teses de doutoramento.
- d) Ser membro dos tribunais de avaliación das teses de doutoramento.
- e) Colaborar na docencia non regrada.
- f) Participar en órganos consultivos e desenvolver as funcións de coordinación institucional regulamentariamente permitidas.

CAPÍTULO II. Procedemento para o nomeamento de profesorado emérito

Artigo 4. Solicitude

A solicitude para o nomeamento de profesorado emérito será presentada antes da data de xubilación da persoa proposta pola dirección do centro ou do departamento de adscrición, logo do acordo da xunta de centro e do Consello de Departamento, ante a vicerreitoría con competencias en materia de profesorado.

Artigo 5. Documentación

Xunto coa solicitude, deberase achegar a seguinte documentación:

1. O plan de actividades que desenvolverá a persoa proposta, se for nomeado profesora ou profesor emérito.
2. O currículo da persoa proposta.
3. O informe razoado do Consello de Departamento, que xustificará os méritos destacados da persoa candidata, así como a oportunidade e o interese científico da colaboración.
4. O informe razoado da xunta de centro.

Artigo 6. Tramitación

A vicerreitoría con competencias en materia de profesorado, logo de comprobar o cumprimento dos requisitos establecidos no artigo 2, remitirá as solicitudes á comisión delegada do Consello de Goberno con competencias en materia de profesorado para que emita o correspondente informe e, posteriormente, ao Consello de Goberno para a súa aprobación, se for o caso.

Unha vez aprobada a proposta polo Consello de Goberno, a reitora ou o reitor efectuará o nomeamento.

Artigo 7. Nomeamento

O nomeamento será por tres anos. Con efectos honoríficos, terá carácter vitalicio.

Artigo 8. Prórroga

Poderase solicitar unha prórroga por un período máximo de dous anos, que finalizará cando a persoa nomeada cumpra os 75 anos.

A prórroga deberá ser solicitada pola dirección do centro ou do departamento, logo do acordo da xunta de centro ou do Consello de Departamento, e deberá ir acompañada dun plan de actividades para ese período.

As solicitudes de prórroga serán resoltas pola comisión delegada do Consello de Goberno con competencias en materia de profesorado.

CAPÍTULO III. Réxime aplicábel ao profesorado emérito

Artigo 9. Condicións

Para desempeñar as súas actividades o profesorado emérito terá dereito ao uso da conta de correo electrónico e das ferramentas informáticas institucionais, así como a acceder a todos os servizos da biblioteca universitaria. Así mesmo, poderá participar en todas as actividades culturais e deportivas nas mesmas condicións que o persoal en activo.

O centro habilitará espazos de traballo específico para o profesorado emérito.

Artigo 10. Vinculación

O nomeamento como profesorado emérito non suporá a existencia de ningún vínculo contractual coa UDC.

Disposición adicional. Habilitación

Habílitate a persoa titular da vicerreitoría con competencias en materia de profesorado para interpretar e resolver as dúbidas que presente a aplicación desta norma, e para ditar as instrucións que resulten precisas para a súa efectividade.

Disposición transitoria

Para as persoas que fosen nomeadas como profesorado emérito conforme co Regulamento polo que se aproban as normas reguladoras do nomeamento de profesorado emérito e honorario da UDC, que aprobou o Consello de Goberno o 31 de maio de 2017, rexerán as condicións nel establecidas.

Igualmente rexeranse por estas mesmas normas as solicitudes das persoas que se xubilen con data límite de 31 de agosto de 2026.

Disposición derogatoria

Esta normativa derroga calquera outra norma ou disposición da UDC relativa ao profesorado emérito, en concreto o Regulamento polo que se aproban as normas reguladoras do nomeamento de profesorado emérito e honorario da UDC, que aprobou o Consello de Goberno o 31 de maio de 2017, no que se refire ao profesorado emérito.

Disposición final. Entrada en vigor

Esta normativa entrará en vigor a partir do día seguinte ao da súa publicación no Taboleiro Electrónico Oficial (TEO) da UDC.

O reitor

Ricardo José Cao Abad